

神枕拾

異中遺

經書記



枕

中

書

葛洪著

中華書局

叢書集成初編所選
唐宋叢書漢魏叢書
寶顏堂祕笈龍威祕
書皆收有此書寶顏
本刊刻較精故據以
排印並附漢魏本王
謨跋於後

枕中書

晉 葛洪著 明 高承寔校

洪歷觀天地之寶藏。上聖之宮第。至上之尊神仙圖記。猶未知極妙之根。以去月乙丑夜半。靜齋於浮羅山。忽驚風駭起。香馥亂芳。龍鳴虎嘯。躡躡空中。有頃之間。紫雲覆林。忽見一真人。眼瞤正方。項負圓光。天顏絕世。乘白麟之車。建九旄之節。腰帶瓊文鳳繡之錦旂。頭戴六通之冠。年可二十許。侍者執夜光之火玉。羽衛可有千人。自號玄都太真王。問曰。子是葛洪乎。何爲而希長存。洪稽首披陳。長跪執禮。神告余曰。子是籍九天之嘉慶。乘運挺英。復千年之後。太清有仙伯之名。今當遠變去世。卜宅西鄉。相攜於太華之上。丹宮之中。且還時朝。以龍淵代身。密乎寂往。莫識今真子窮翫墳典。聰秀逸羣。解滯悟惑。可謂妙才矣。但未知真仙之宮第。上聖之所由耳。吾今行矣。相告。計共事不復爲久也。洪因伏叩頭。於是真人卽令侍者執筆。壁紙口授妙言。旣畢。左手授與洪云。吾往方丈簡仙官。致復相過。子勗之焉。吾去矣。見駕乘冉冉而高。乃失所在也。

真書曰。昔二儀未分。溟滓鴻濛。未有成形。天地日月未具。狀如雞子。混沌玄黃。已有盤古真人。天地之精。自號元始天王。遊乎其中。溟滓經四劫。天形如巨蓋。上無所係。下無所依。天地之外。遼屬無端。玄玄太空。無響無聲。元氣浩浩。如水之形。下無山嶽。上無列星。積氣堅剛。大柔服維。天地浮其中。展轉無方。若無此

氣。天地不生。天者如龍旋迴雲中。復經四劫。二儀始分。相去三萬六千里。崖石出血成水。水生元蟲。元蟲生。濱牽。濱牽生剛須。剛須生龍元。始天王在天中心之上。名曰玉京山。山中宮殿並金玉飾之。常仰吸天氣。俯飲地泉。復經二劫。忽生太元玉女。在石澗積血之中。生而能言。人形具足。天姿絕妙。常遊厚地之間。仰吸天炁。號曰太元聖母。元始君下遊見之。乃與通氣。結精招還上宮。當此之時。二氣網緼。覆載氣息。陰陽調和。无熱无寒。天得一以清。地得一以寧。並不復呼吸。宜氣合會相成。自然飽滿。大道之興。莫過於此。結積堅固。是以不朽。金玉珠者。天地之精也。服之服與天地相畢。元始君經一劫。乃一施。太元母生天皇十三頭。治三萬六千歲。書爲扶桑大帝。東王公。號曰元陽父。又生九光玄女。號曰太真西王母。是西漢夫人。天皇受號十三頭。後生地皇。地皇十一頭。地皇生人皇九頭。各治三萬六千歲。聖真出見受道。天氣爲建初混成。天任於令。所傳三皇天文。是此所宜。故能召請天上大聖。及地下神靈。无所不制。故天真皇人三天眞王。駕九龍之輿是也。次得八帝。大庭氏。庖羲。神農。祝融。五龍氏等。是其苗胤也。今治五嶽。是故道隆上代。弊極三王。三王夏禹殷湯周武也。是以淳風既澆。易變而禮興。禮爲亂首也。周末陽弱而陰強。國多寡婦。西戎金兵起而異法興焉。既而九州湮沒。帝業荒蕪。此言驗也。後來方有此事。道隆之代。其人混沌。異法之盛。人民猾僞也。洪曰。此事玄遠。非凡學所知。吾以庸才。幸遭上聖。矚目論天地之奧藏。暢至妙之源本。輒條所誦。銘之於素。以爲絕思矣。夫無心分之人。慎勿以此元始告之也。故置遺跡。示乎世之賢耳。

真記曰。玄都玉京七寶山。週迴九萬里。在大羅之上。城上七寶宮。宮內七寶臺。有上中下三宮。如一宮。城一面二百四十門。方生八行。寶林綠葉朱實。五色芝英。上有萬二千種芝。沼中蓮花徑度十丈。上宮是盤古真人。元始天王。太元聖母所治。中宮太上真人。金闕老君所治。下宮九天真皇。三天真王所治。玉京有八十一萬天路。通八十一萬山嶽洞室。夫以得道大聖衆。並賜其宮第居宅。皆七寶宮闕。或在名山山嶽。羣真所居。都有八十一萬處。古今有言九九八十一。是終天路。玉京山也。上仙受天任者。一日三朝。玄都太真人也。雖有億萬里。往還如一步耳。世人安知此哉。衆仙或有日三朝扶桑公。或三朝西王母。玉京金闕。是太上真人。月三朝元始天王。太上真人。元始之弟子。皆如帝王。有司徒丞相也。金闕老子。太上弟子也。扶桑大帝。元始陽之氣。治東方。故世間帝王之子。應東宮也。

西漢九光夫人。始陰之氣。治西方。故曰木公金母。天地之尊神。元氣鍊精。生育萬物。調和陰陽。光明日月。莫不由之。精神長存。命則無終。抱一不離。故能長久。天失陰陽。水旱不節。人失陰陽。神根命竭。世人不能保一守三。修生反死。固其宜矣。可後怨耶。吾復千年之間。當招子登太上金闕朝宴玉京也。此電頃未足爲久。今且可浮遊五嶽。採靈芝。尋隱仙之友。逍遙無爲。吾言信可望哉。

扶桑大帝。住在碧海之中。宅地四面並方三萬里。上有太真宮。碧王城萬里。多生森木。葉似桑。又有樁樹長數千丈。二十圍。兩同根偶生。更相依倚。名爲扶桑。宮第象玉京也。衆仙無量數。玄洲方丈諸羣仙。未昇天者在此。去會稽岸六萬里。太清仙伯。太上丈人所治。蓬萊山對東大海之東北岸。山週迴五千里。溟海

中瀟浪衝天九氣丈人所治。

崑崙玄圃金爲塼城四方千里城上安金臺五所玉樓十二瓊華之屋紫翠丹房七寶金玉積之連天巨獸萬尋靈香億千西王母九光所治羣仙无量也。

廣成丈人今爲鍾山真人九天仙王漢時四皓仙人安期彭祖今並在此輔焉。

務成子力墨子爲岷山真人今玄子玉子爲岷山侯。

太吳氏爲青帝治岱宗山顓頊氏爲黑帝治太恆山祝融氏爲赤帝治衡霍山軒轅氏爲黃帝治嵩高山金天氏爲白帝治華陰山。

右五氏爲五帝

堯治熊耳山舜治積石山禹治蓋竹山湯治玄極山青鳥治長山及馮修山長。

右五人爲五帝佐相領五帝事五帝一劫遷佐者代焉

許由巢父今爲九天侍中箕山公夏啓周發受書爲田極明公或住羅鄴或在洞天三周大者爲降陵真人二人並在金華山漢高祖光武並爲四明賓友周靈王令爲太虛侍郎治波龍山樂子長闔家得仙未昇天任並住方丈之室神洲受太玄生錄五芝爲糧也郭景純爲都錄司命治虛臺也左元放今爲天柱真人監仙侯葛玄受金闕君命爲太極左仙公治蓋竹山又在女兒山常駕乘虎騎也許映始爲蜃林仙人許穆在華陽洞天立宅爲真人許玉斧在童初之北位爲真人未有掌領鮑靚爲地下主者帶潛山真

人復五百年當爲崑山侍郎。鄭思遠住南嶺。常乘虎豹白鹿。未有職事。蔡鬱壘爲東方鬼帝。治桃丘山。張衡楊雲爲北方鬼帝。治羅鄴山。杜子仁爲南方鬼帝。治羅浮山。顧光蠻鬼。周乞稽康爲中央鬼帝。治抱犢山。趙文和王真人爲西方鬼帝。治嶧冢山。

夫地仙遊五嶽。朝朝西王母。夕憩鍾山嶽。雖未昇天。此觀樂亦難言也。及童初之府。易遷之宮。唯有此樂也。名山之中。年年有仙去者。世人不見。不信神仙。可哀嘆也。夫學不顧軀命。心志清白者。吾未見虛往也。或修之不勤。勤而不除貪慾之樂。三業十惡未改。猶抱石而赴長津矣。

吳越及梁益風氣清貞。故多仙人。是以成都之境。丹陽之域。會稽之東南。天路所衝。善宜修尚也。凡此衆仙及命過受書者。巨衆不可具記。在小嶽之中者。亦略舉之也。

鬼谷先生爲太玄師。治青城山。王子喬爲金闕侍中。治桐柏山。赤松爲崑山仙伯。治南嶽山。王子登爲小有天王。治王屋山。孤竹伯夷叔齊等並爲九天僕射。治天台山。孔丘爲太極上真公。治九嶷山。顏回受書初爲明臬侍郎。後爲三天司真。七十二人受名玄洲。門徒三千。不經北鄴之門。項儀山爲蓬萊司馬。周公旦爲北帝師。治勁革山。莊周爲太玄博士。治在荊山。孫權受任治亦在荊山。張道陵爲三天法師。統御六虛。數侍金闕。太上之股肱。治在廬山。三師同宅。王方平今爲上相。治月支國人鳥山。堯霍爲太極仙卿。治馬跡山。徐來勒爲太極真。治括蒼山。小宮在天台上。陳世安治小台山。嚴君平今治在峨嵋山。屈原爲海伯。統領八海。王弼爲北海監。郭聲子爲閩風真人。魏夫人治南嶽山。裴清靈治四明山。馬明生今在鍾山。

陰長生爲地肺真人。孫登閭丘真人。九華真妃治夏蓋山。或在龍山。王長趙昇二人受書爲廬山中正。三天都護。韓衆今爲霍林真人。瑯琊爲太虛左掾侍史。

三茅爲保命定錄司非監。在華陽洞府治北。居棲抱山有數千。小山亦不減百。皆是神山。今略證仙人之數。足以令子心堅仰慕矣。祕之勿宣。若高賢心馳嶺外。子去世之際。可緘以示之。苟行業不建。德務不仁者。終天無令見也。凡青幃之裏。千嶺之際。仙人無量。與世人比肩而不知。凡人有因緣者。或在深山。迷誤入仙家。使爲仙洞玉女所留。請先功厚也。初學道不必入山。閉門勤修。不離人物。長齋執志。或清香灑掃。亦能降真矣。魏夫人許氏之徒。皆其流也。要當摺拾方術真書。良久傳影響。應便當絕逆耳。若出入人間。覓拾山谷事。緣衣服飲食。不須與世交。常有異矣。外和光同塵。內守其真。一斯言之妙也。

右葛洪枕中書一卷。始載陶氏說。郭唐宋叢書采入子餘。按唐志神仙家亦載有枕中素書一卷。而不詳撰人。未知卽此書否也。若隋志謂道經者云。有元始天尊。生於太元之先。稟自然之氣。冲虛凝遠。莫知其極。所以說天地淪壞。劫數終盡。略與佛經同。而以天尊之體。常存不滅。每至天地初開。或在玉京之上。或在窮桑之野。授以祕道。謂之開劫。非一度矣。今洪此書自云得授上真。亦有元始四劫二劫玉京扶桑之論。與道經相應。則固不可以常理測矣。至言三皇五帝及諸聖賢。皆爲仙官。主治某山。又多與陶宏景真靈位業圖合。而說較有原委。要其荒誕不經。瞞人耳目。不過與神異洞冥

諸書等耳。姑從唐宋叢書采錄於此。汝上王謨識。（按此跋據漢魏叢書本錄附）